



Komunikadu Imprensa
20 Feveiru 2013

Tribunál Distritál Dili kondena pena multa ba autór kazu violénsia doméstika

Iha 18 Feveiru 2013 tribunál prezide leitura sentensa ba krime natureza violénsia doméstika. Antes ne'e iha 01 Feveiru 2013 Tribunál Distritál Dili hala'o julgamentu produsaun de-prova.

Ministériu Públiku (MP) akuza katak iha 30 Novembru 2010 arguidu José dos Santos Lemos basa dala rua, tebe dala haat hasoru nia kónjuje Ilda Mutu-bere to'o monu ba rai. Aktu ne'e rezulta lezada hetan kanek iha ain no moras iha oin.

“JSMP kontinua apresia esforsu tribunál tanba fo prioridade hodi kontinua julga kazu natureza violénsia doméstika no ita hein katak prosesu ne'e bele eduka públiku hodi kompriende katak, violénsia doméstika nu'udar krimi públiku” dehan Diretór ezekutivu JSMP Luis de Oliveira Sampaio.

Ministériu Públiku akuza arguidu kontra artigu 145 Kódigu Penál, kona-ba ofensa ba integridade fízika simples no konjuga ho Lei Nú. 7/2010 Lei Kontra Violénsia Doméstika.

Ministériu Públiku husu ba tribunál atu kondena arguidu ho pena multa, lora ida selu \$. 1.00 no sei selu durante lora atus ida ho total osan dolar Americanu \$. 100.

Iha julgamentu arguidu konfesa total faktus, no tribunál konsidera faktus hotu ne'ebé konsta iha akuzasaun provadu.

Hatan ba alegasaun MP nian, husi parte defeza argumenta katak arguidu kolabora ho prosesu julgamentu. Aleinde ne'e nia arepende, konsiliaun iha familia no responsavel úniku ba familia, tanba ne'e husu atu tribunál aplika pena ne'ebé justu tuir arguidu nia hahalok.

Hafoin rona tiha alegasaun no argumentu husi parte sira, tribunál konklui hodi kondena arguidu ho pena multa bázeia ba MP nia alegasaun finál.

Kazu ne'e rejista iha tribunál ho Número Prosesu: 479/2011/TDDIL. Julgamentu prezide husi Dra. Ana Paula Fonseca. Dr. Oscar Tavares mak representa Ministériu Públiku no arguidu hetan defeza husi Dr. Andre Zerrotu Advogadu Internasionál.

Atu hetan informasaun kle'an favor kontaktu direktamente:

Luis de Oliveira Sampaio
Diretór Ezekutivu JSMP

Diresaun e-mail: luis@jsmp.minihub.org

Landline: 3323883 / 77810637

www.jsmp.tl